

東明縣新志

天津趙元禮



癸酉春月

東明新志

天津趙元禮



忠義

忠爲心之主義乃事之宜以平旦之氣而運萬物之機既不慚乎衾影復無忝于所生縱鼎鑊列前桁楊在後只以義所當爲弗之避也子輿氏所謂富貴不淫貧賤不移威武不屈者是矣而尼父亦曰有殺身以成仁毋求生以害仁斯乃天地之正氣忠義之極規也東明介魯衛東望洙泗之澤西接君子之鄉忠義大節素所薰陶者也茲謹擇其尤著者次之於篇云

隋

單雄信佚其字矣雄信善技擊素有大志隋大業十二年煬帝流連江都中原大亂李密竇建德劉武周輩先後起而唐祖以晉陽留守入長安自爲丞相王世充以敗字文化及之後亦復始而脅制帝子繼而僭鄭自立雄信與李勣等初事密後密敗歸唐雄信改事鄭矣世充愛其驍勇臨陣輒陷臨城輒登人稱爲飛將軍武德三年太宗時爲秦王督諸軍伐鄭鏖戰數月卒克洛陽鄭主世

充面縛詣秦王軍次降而雄信已被擄矣義不事二主故人李勣等說之不可也竟斬東都雄信有曰東郡人或曰離狐人而今之縣城卽大單集之故地也馬鬣之風歸然猶在則其爲離狐人也不益信歟故列焉而爲忠義首嗚呼豹死留皮人死留名王鐵鎗對邈佶烈之言也若雄信之侃侃語勸等者殆早已開其端矣

朱梁

龐師古佚其字南華人也朱溫未篡時兼領四鎮治宣武得馬五十匹卽以師古將之從破黃巢秦宗權皆有功旋溫攻時溥未下留師古守之師古進取宿遷屯呂梁溥以兵兩萬出戰師古衝其鋒大敗之斬首兩千級孫儒取楊州淮南大亂溫遣師古攻儒爲儒所敗而是時朱珍李唐賓相繼死命師古與霍存分領其衆王友攻徐州不克太祖怒奪其兵復以屬師古師古破徐州溫表爲留後溫受禪爲梁攻鄆州臨濟水師古撤木爲橋首以中軍濟朱宣死竟

明

鄆悉下溫遂遣師古與葛從周攻吳王行密於淮南出師清口清口地勢卑溼或請依高爲柵師古曰非上命也不聽無何吳人決水浸之兵不能陳被獲屈之不可竟見殺嗚呼朱梁之惡極矣而得王彥章之外復得師古其果用之有道歟抑亦忠孝本於天性而二人者又特稟之厚歟歐陽文忠爲五代史最惡朱梁而獨許二人以義有以哉

董三齊字表渤號應賜祖大化以乙榜官至臨安守著循聲三齊生而穎異絕倫日記誦數千言弱冠應童試列前茅補博士弟子員業業高名識者早有大器之目而三齊益縱力於經史每於古今忠佞之別治亂得失之理輒拍案毗裂爲斤斤辨與二三知契談益舉之爲法戒崇禎庚午舉于鄉與其兄三晉同榜文名藉藉人稱二難公車赴禮部試不第以薦授大同府司理甫抵官所有市易胥吏以舊例官價進三齊正色曰焉有冠進賢行廷尉而攫利市上以徇

己私者乎若教我拒斯民於千里之外者也重笞之且禁官價無復用平反冤獄以數百計要犯賀奎光等數十案屢以輕擬駁再審三齊執議不撓曰法如是也多求之是深文也求其生而不得死者與我無恨也况其有得也而忍周內以死耶吾一日在官此囚決不抵誣最後三法司卒如其議轆轤會首李文才等歆血將謀不軌三齊單騎往覘賊廉其反狀卽撲滅之時晉督以軍務倥偬而審其能疏授三齊爲監紀推官任事一載信賞必罰功罪悉當人爲折服經歷史譏忤當事旨摘赴靈邱修城侵冒官坐大辟屬三齊爲讞三齊憐其冤力白之上官事得未減已而譟實多金於魚腹爲三齊壽三齊怒曰爾以昏夜之行溷乃公耶叱之去鎮將張某有罪當對簿竟具紹參爲三齊母壽三齊曰吾終不以盜源水飲吾母也扑其使反之論如法俸滿行取方膺部曹之命而甲申變作矣闖賊李自成由秦入晉履冰渡河晉撫蔡懋德死之遂克寧武陷雁門長驅雲中文武吏望之披靡所在或降或遁巡撫衛公景瑗忠孝人也素

知三齊賢而問計三齊撫膺太息曰闖賊北來其志難測勢將捲宣大道居庸
焚十二陵然後以全力圖我神京公達人也當知之審矣爲今之計惟有堅壁
清夜以待援師援師既至然後鎮兵應于內援師攻于外收效夾擊彼賊頓兵
堅城爲期既久必可破也景瑗大喜過望曰聞君之言殊強人意恨用君晚頃
之鎮將姜驤首迎賊城遂陷三齊度事不可爲遽投環死未殊而闖賊入晉時
已潛訪孰爲循吏列有三齊名至是聞三齊且死馳至急救之曰我知爾好官
從我何患不富貴勿徒死也三齊髮指衝上而罵曰我皇明命官恨不能食爾
肉寢爾皮豈肯從爾爲賊耶其速殺我不然我且殺爾賊笑曰癡人果以性命
爲戲矣三齊仍罵不絕口曰二祖列宗神靈在天豈容爾長此縱橫爾死且不
旋踵矣賊知終不爲用下之獄撈掠備至三齊臥地絕食期必死時其弟相隨
在官冒死入省三齊泣執其手曰吾千里奉母本圖榮養不意事竟至此天乎
吾斷不稍屈以求苟活爾其將母歸里善事之有子爲忠臣勿過傷也強起而

仆者三東向叩首曰臣生不能報陛下敢愛其死又南向稽首曰養母不終兒且爲千古罪人矣遂扼吭而死死之日大同士民號哭填街衢爲具棺殮焉三齊事親孝常官廉臨大難不苟其成就之卓犖誠可謂一代完人也而南都既立卹典亦缺焉弗給宜乎甲申三月之後而卽繼以乙酉五月也至其垂髫之子陷入賊中竟逢故吏陰爲護持計而脫之卒奉其柩以歸則天道之不負忠孝也爲益信云

張力字扛候號溯汾崇禎丁丑進士授萊州推官萊濱海俗強悍多盜號難治力治有聲教行民化一郡感焉時有海寇擾萊東鄙鎮將某莫敢撓力代擊破之于芙蓉島斬首數十級遂屠其巢民益謳歌之弗諼也力忠直慷慨孝弟性生時值明季中原大擾力每切齒於奸相懦帥之誤國輒思求以報君親會行取入都覲見回繞道掃墓而闖賊陷京師烈皇帝殉社稷矣畿南各縣遍設僞官僞令王秉純亦至東明力首倡義舉執秉純誅之而衙蠹程抱六等方擁兵

竟執送力等于懷慶賊營力罵賊不屈死之事平祀鄉賢

劉璧星字聚五二酉其別號也世業儒璧星穎悟多才遇事宏毅能斷少隨父之白水縣任適寇警爲區畫方略悉中機宜識者咸以大器期之其父亦異之曰是能光我門閭者以邑庠生中萬歷乙卯舉人選授卽墨知縣著循良稱丁憂歸值大侵捐資施粥民賴以活者甚多尋而甲申變作與張力等同誅僞令同遇害祀鄉賢

范春駿字倩美號元度性端慤嚴重不苟言笑少孤貧功夫力讀貫通子史百家之書而尤精韻律之學弱冠童試壓其曹補邑庠名噪黌宮天啓甲子以尙書中經魁選知商南德政大著一邑爲感調繁崇信未赴假旋而甲申變作與張力等誅僞官同遇害有清定鼎後春駿舊僕某義士也剖衙蠹金龍心以奠春駿墓蓋金龍卽害春駿等之元兇也時人快之尋予祀鄉賢

李允樟字若樞憲副建和子也以胄監官武英殿中書舍人以京朝不綱憤而

東明縣志
歸隱深沉自晦杜門謝絕賓客卽親友故舊終年亦不一晤也惟有汲古癖如金石鼎彝及古名人書畫則流連玩賞不忍釋也無何甲申變作與張力等同誅僞官同遇害同祀鄉賢

辛廣慈字航海邑庠生進士廣恩弟也性沉靜寡言不預外事時爲閉戶之修尋以甲申之變與張力等同誅僞官同遇害祀鄉賢廣慈一諸生耳而竟與張力等同爲義舉則其忠藎之節浩然之氣所秉當爲特厚也錢蒙叟王覺斯等輩聞之能無愧死耶

嗚呼右列六人東明之晨星碩果也三齊雖爲推官行取將入都矣力等四人皆在籍無官守無言責也至廣慈僅青衿一領耳若持模稜者可以死可以無死之說則僞官尙可以不誅也又何死乎山陰劉念臺先生曰不當與城爲存亡獨不當與土爲存亡乎此宋故相江萬里所以死也富哉言乎足以奪騎牆者之魂而褫長樂老之魂矣烈哉六君子可以媲美念臺而無愧焉

清

崔汝聽字聰菴孝廉杰子明南京兆邦亮後也少承家學蜚聲翼序嘉慶戊辰舉于鄉選授隆平縣教諭非所好也任二年卽賦歸來而性慷慨喜談兵每恨不能與唐李文饒明盧建斗諸公抵掌千古也十八年癸酉教匪李文成據滑縣知縣強忠烈公克捷死之而臨滑各縣亦同時戒嚴長垣知縣趙公崙單騎赴韋園村訓諭黨匪者亦被害文成遂遣其黨徒大舉東犯圍縣城者至再知縣朱煒會把總栗得貴等起兵殺賊並商之汝聽汝聽慨然曰麼魔跳梁越我雷池老夫雖疲曷敢避難卽同邑四品頂戴高嵩高峨千總王欽經歷崔榮甲崔伯埏舉人尙萃貢生崔榮梯生員吳相李寶樹武生吳士登張得正附貢生范學恆王森吳士淳例貢生李泮聲候選知州李沛聲孟鈺倡衆守城捐貲儲備按日分口給食民乃大安而士登得正尤激烈異常踴躍登陴昕夕雜編氓中巡邏荷戈不少懈也賊恨其固守決計屠之適提督馬瑜副都統蘇爾慎率

東陽縣志
大軍來援勦生擒賊將翟元良等大敗之賊乃宵遁而圍始解矣城之不亡蓋汝聽等力也

嗚呼李文成之變與林清同約而誤約者也卽誤約矣東明倘不幸而失則東連宋曹西窺澤潞吾恐那文毅揚忠武亦難措其施設也是汝聽等之功不僅及于地方矣烏可忽哉而酬庸弗及未免失之闕焉

遂永錫佚其字儒童也然不喜爲章句學而短小精悍好談兵家言太公孫武書類能詳之乃以時值承平未有所施也嘉慶十八年歲癸酉李文成據滑縣反且擾東明知縣朱煒命各鄉團練鄉兵爲自衛計永錫拊髀慨然曰此其時矣與兄永清弟永泰永安等倡首殺賊一鄉和之稱重鎮十一月四日與賊遇于公西集鏖戰良久賊將不支而佯退以給我之深入永錫奮勇直前追至曹家店圍且數匝月猝伏發不虞團勇駭而潰退永錫遇害事聞清睿皇帝溫旨予旌入祀忠義孝弟祠

何庠元佚其字國學生也居嘗緘默不苟言笑鄉人重之嘉慶十八年教匪據滑縣擾東明庠元亦團總之一也率鄉勇防禦城西一帶數十戰皆捷屹然保障城廂恃以爲安者也無何十一月四日之戰與遂永錫同追賊中伏發同遇難事聞二十二年奉清睿皇帝旨入祀忠義孝弟祠

于全海武庠生也咸豐九年皖匪由曹考突來衆十餘萬全誨糾合義勇迎頭截勦卒以衆寡不敵與子伯鵬同遇害陣亡義勇復數十人其名氏莫能詳也時有處士何鳳鳴者慷慨任事與于全誨同率鄉勇禦賊亦以衆寡懸殊誓死不却與子庠生澄清及兩孫俱怒目赴賊死

嗚呼教匪亂於癸酉捻犯始於己未相去四十五年而遂永錫等尙膺蒸嘗之命庶慰元元之望獨于全誨何鳳鳴父子祖孫及同全誨之陣亡數十人竟爾寂寂死也同之虛牝人謂清政不綱始于文宗之季良不誣也

李恆字心一候選直隸州沛聲子也家素封而代多隱德其曾祖子章以下忠

東明縣志
五十二
誠篤厚喜施與鄉人歸之恆尤慷慨童試報罷後援例選布政司理問而需次
聽鼓非所好也亦不赴獨于縣中修城池建書院築橋梁立義倉諸要政罔不
踴躍爭先爲一邑倡咸豐五年河決銅瓦大溜直趨縣城恆督修堤堰城賴以
亡恙者數年尋以髮捻北犯土寇並起衆推恆爲城關團團正恆乃出貲募勇
製械練操與忠精諸團聯絡遂爲一邑保障十一年春桂林易大令煥書來知
縣事素輕賊常調團勇勦賊穴恆諫之曰賊勢已大非往日比矧城垣傾圯無
險可守苟固吾圉所全已多冒險遠涉非策也而煥書意銳甚然其言而未之
用也仍率衆爲迎頭之勦乃賊意在渡河而西以被我軍牽掣之故不得逞憤
而約東匪十餘股于五月五日黎明蜂擁至城垣強半頽不得已爲背城借
一之圖酣戰良久援賊復大至我兵大潰城遂不守恆更率勇巷戰遂遇害事
聞時以英法聯軍陷京師清文宗崩于木蘭行在末之卹也迨同治九年髮捻
底定穆宗始下詔曰朕惟尙德崇功國家之大典輸忠盡職臣子之常經古聖

帝

明王戡亂以武致治以文朕欽承往制甄進賢能特設文武勛階以彰激勵受茲任者必忠以立身仁以撫衆智以察微防奸禦侮機無暇時能此則榮及前人福及後嗣而身家永康矣爾李恆原係布理問銜因在籍率團堵禦東匪陣亡加恩給予雲騎尉世職與爾嫡長子李際隆承襲准再襲一次欽之哉並予建專祠子際隆字景運承襲雲騎尉以州同候選賞藍翎歷充義倉倉正城廂團正倡築堤堰以障河患擴修書院以造械樸鄉人齒芬以爲無慚名父也卒長子肇恩襲歷充警務總董城廂首事及肇恩卒恆陰停襲而清社亡矣又恆之從曾孫沿字東之諸生也性倜儻不羈民國初迭充城區鄉董警董保衛團總團長等職惟剛而負氣竟死于鍛鍊之獄人多惜之

崔壻字和謨廩膳生也學博品端士林尙之家居教授生徒每視才質之高下爲施教之程序一時翕然稱爲名師值捻匪北犯東明受蹂躪殆徧事定而有團練之舉城廂團羣推李恆爲團正壻副之此咸豐十年事也十一年五月五

日東匪十餘股蜂擁至城垣圯于水弗能守也。壻乃整隊迎擊於東關外，殺賊多名。酣戰間，賊突以驍騎衝我左翼，出不意我軍遂潰，而兵與賊不辨矣。互相格殺死者數百人。壻罵賊不屈，遂遇害。明日辰，其子重得壻尸於東關外，身受數傷而戟手怒目，儼然罵賊狀也。壻與恆同事，復同日戰死。事聞，亦於同治九年蒙旨予雲騎尉世職，祀復與李恆同祠。邑紳范承雯爲恆壻合傳，載藝文志。而大宗伯河內李文清公爲其祠堂碑記，尤表彰之。世職子重襲。

嗚呼！有清咸同之間，髮捻回交，乘而起督撫、牧伯、望風而遁，逃者踵相接也。恆壻不過辦團練之鄉紳耳，兵之初敗，原可以自全也，而乃見義勇爲，視死如歸。雖古烈士何加焉？河內李文清更製其祠堂楹聯云：國士無雙，雙國士忠臣不貳；貳忠臣恆壻死，且不朽矣。何傷乎？

盧經閣佚其字邑增生也。咸豐十一年，東匪滋擾，經閣預知縣人李遷之通賊也，擬祕約鄉人士殲除之，以消患于無形。無何事未舉而謀洩，遷遂執經閣酷

審備至經閣罵不絕口而于他則一無所牽也竟遇害而羊角大風忽起于戶旁隱隱冲霄漢閣閣有聲時五月晦日也後附入李崔忠義祠

張清翰國學生也字則佚之矣家富饒好施與人歸多之蓋一鄉長者也咸豐十一年東匪魯怪毛等嘯聚濮州之甘露集與清翰居毗相接而素賢清翰以劫之爲酋則風聲所樹響應必多事可立致也清翰聞之乘夜迅赴縣以告時知東明者爲桂林易公煥書卽命清翰聯鄉團拒賊賊憚之不敢南犯無何黃流突漲各村團丁多暫歸防水賊知其無備也駕巨艦猝至執清翰及其二子清翰義不屈且罵且數之賊恨終不爲用遂磔之二子亦俱見殺光緒二十一年以鄉紳之請附入李崔專祠其同時因殺賊而死而其他事跡不可得見者亦均列之於後

張蝶章

庠生

郭子晉

庠生

盧行健

軍功

程林翰

貢生

邵

鑑

李恩元

武生

張蘭廷

武生

劉東木

隊長

李廷芳

邵

植

武生